

A painting of a shepherd with dark hair and a beard, wearing a yellow tunic and orange cloak, holding a wooden staff. He is reaching out his right hand towards a small white lamb. The background shows a green hillside with rocks and a blue sky.

FESOASOANI MAI LUGA

Tu'ufaatasia e Uatisone Kutimeni

Tufa fua—E le faatauina

FESOASOANI MAI LUGA

“FESOASOANI MAI LUGA” O le tu’ufaatasiga o faiupu valalata o Tusitusiga i Mataupu mai vaega eseese o le Tusi Paia lava ia. Ou te talitonu o tusitusiga e sili atu ona malamalama lelei i Tusitusiga o le Tusi Paia lava ia.

O le Afioga a le Atua e “mai lugā” e maua mai ai fesoasoani uma mo le tagata galala ma le fia inu i le amiontu. Ina ua salamō le tagata, lafoa’i i ana agasala, a e valaaaulia ma le faaaloalo le Ali’i o Iesu Keriso e afio mai i lona loto, ma tatiltonu i lona loto atoa i le Alii o Iesu Keriso o lona Faaola, o le Ali’i lava Ia o le a afio i totonu ia te oe ma faasoasoa atu lona olioli ma le filemu i le tagata ua talitonu lona loto. Na ou maua ina lenei malamalamaga i le 1937, ma e oo mai nei e le’i motusia lea mafutaga matagofie faatasi ma le Ali’i. Ou te augani atu ai ia te oe ina ia e tuuina atu atoatoa oe ia te Ia o lou Faaola ma lou Ali’i NEI, pe afai e te le’i faia lava.

—Uatisone Kutimeni (1920-2002)

Alofa O Le Atua

1

Roma, 5:8.

A ua faaalitinoina mai e le Atua lona lava alofa ia te i tatou, ina ua maliu Keriso ma sui o i tatou, a o tatou agasala pea.

Ioane, 13:1.

A O lei oo i le tausamiga o le paseka, ua silafia e Iesu ua oo mai ona po e tuua ai e ia lenei lalolagi, a e maliu atu i le Tamā; ua na alofa i ona tagata o i le lalolagi, ua ia alofa ia i latou ua oo i le gataaga.

Faaaliga, 1:5.

Mai ia Iesu Keriso foi, o le molimau faamaoni, o le ulumatua o e ua oti, ma le pule i tupu o le lalola-

gi. O le na alofa mai ia te i tatou, na ia fufulu mai foi ia te i tatou i a tatou agasala i lona lava toto.

Ioane, 3:16.

Auā ua faapea lava ona alofa mai o le Atua i le lalolagi, ua ia au mai ai lona Atalii e toatasi, ina ia le fano se tasi e faatuatua ia te ia, a ia maua e ia le ola e faavavau.

Ieremia, 31:3.

Na faaali mai Ieova ia te au anamua, ua faapea mai, O le alofa e faavavau, ua ou alofa atu ai ia te oe; o le mea lea ua ou faafualoaina ai lo'u alofa ia te oe.

Itu—Atua O Iesu Keriso

Ioane, 1:1 ma 14.

Sa i le amataga, le Lokou, sa i le Atua le Lokou, o le Atua foi le Lokou. . . .

Ua liu tino tagata le Lokou, sa mau foi o ia ma i tatou, (na matou matamata i lona mamalu; o le mamalu lava lea o le Alo e toatasi o le Tamā,) ua tumu o ia i le alofa tunoa ma le faamaoni.

Ioane, 14:9, 10.

Ua fetalai atu Iesu ia te ia, Filipo e, ua loa lava ona ou i ai ia te outou, a e te lei iloa ea a'u? O le ua vaai mai ia te au, ua vaai o ia i le Tamā; pe se a foi e te fai mai ai, Faailoa mai le Tamā ia te i ma-

tou? E te le talitonu ea, o a'u o i totonu o le Tamā, o le Tamā foi o i totonu ia te au? . . .

II. Timoteo, 3:16.

O Tusi Paia uma lava e mai le Agaga o le Atua ia, e aoga foi ia e a'oa'o ai, e aoai ai, e faatonu ai, e faapoto ai foi i le amiontu.

Mataio, 1:22,23.

Ua oo nei mea uma ina ia taunuu ai le afioga a le Alii i le perofeta, ua faapea mai, Faauta, e to le taupou, ma fanau mai le tama tane, latou te faaigoa foi ia te ia o Emanuelu; o lona uiga pe a faamatalaina, Ua ia te i tatou le Atua.

I. Ioane, 4:15.

O sē ta'utino atu, o Iesu o le Alo o le Atua o ia, o loo tumau le Atua i totonu ia te ia, o ia foi o i totonu o le Atua.

Kolose, 2:9.

Auā o loo mau i totonu ia te ia le tumu uma lava o le itu Atua ua i lona tino.

Isaia, 9:6.

Auā ua fanau mai mo i tatou le tama, ua foaiina mai mo i tatou le atalii, e i lona ua le malo, e igoa foi o ia, o le Silisili ese, o le Faipule, o le Atua malosi, o le Tamā o le faavavau, o le Alii o le filemu.

Luka, 1:35.

Ua tali mai le agelu, ua faapea mai ia te ia, E afio ifo le Agaga Paia i luga ia te oe, e faamalumalu ifo foi ia te oe le mana o le Silisili ese; o le mea lea e ta'ua ai le tama paia, o le Alo o le Atua.

Mataio, 17:5.

Faauta, o le ao pupula ua ufitia ai i latou a o tautala ia; faauta foi, o le siufofoga mai le ao ua faapea mai, O lo'u Atalii pele lena, ou te fiafia ia te ia; ia outou faalogo ia te ia.

Mataio, 3:17.

Faauta foi, o le siufofoga mai le lagi, ua faapea mai, O lo'u atalii pele lenā, ua ou fiafia lava ia te ia.

4 Ua Faamatalaina E Iesu Ia I Tatou O Ai O Ia

Ioane, 11:25.

Ua fetalai atu Iesu ia te ia, O a'u nei o le toe tu ma le ola; o lē faatuatua mai ia te au, e ui lava ina oti, a e ola lava ia.

Ioane, 8:23.

Ua fetalai atu foi o ia ia te i latou, O outou o lalo nei, o a'u mai Lugā; o outou e ō le lalolagi nei, e le so le lalolagi a'u.

Ioane, 4:25, 26.

Ua fai mai le fafine ia te ia, Ua ou iloa o le a maliu mai le Mesia, (o lē ua igoa ia Keriso,) pe a maliu mai o ia, e faailoa mai mea uma ia te i matou. Ona fetalai atu lea o Iesu ia te ia, O a'u lava lenei, o lē tautala atu ia te oe.

Ioane, 9:5.

Manū ou i ai i le lalolagi, o a'u o le malamalama o le lalolagi.

Ioane, 6:35.

Ua fetalai atu Iesu ia te i latou, O a'u nei le areto o le ola; o lē sau ia te au, e le laina lava ia; o lē faatuatua foi ia te au, e le toe fia inu lava ia.

Ioane, 8:58.

E moni, e moni, ou te fai atu ia te outou, sa a'u i ai, a o lei leai se Aperaamo.

Ioane, 10:7.

Ona toe fetalai atu lea o Iesu ia te i latou, E moni, e moni, ou te fai atu ia te outou, o a'u ne'i o le faitotoa o mamoe.

Mataio, 14:19-21.

Ona fetalai atu ai lea o ia i le motu o tagata ia latou taooto i le mutia. Ona tago lea o ia i areto e limagafua ma i'a e lua lau, ua te-pa ae i le lagi, ua faafetai; ua ia tofitofi foi i areto, ma avatu i le au soo, ona avatu ai lea e le au soo i le motu o tagata. Ona aai ai lea o i latou uma lava, ua maoona; ua latou fu'e foi toe 'aiga, ua tutumu ai ato e sefulu ma le lua. O i latou foi na aai pe limagaafe o tane, a e lei faitaulia fafine ma tama iti.

Luka, 5:5, 6.

Ua tali mai Simona, ua faapea mai ia te ia, Le Alii e, ua atoa le po

ua tigaina ai i matou, e leai ni mea ua maua; a ona o lau fetalaiga ou te tuu ifo ai le upega. Ua uma ona latou faia o lea mea, ona latou siomia lea o le au i'a tele lava, ua masae ai lo latou upega.

Mataio, 20:30 ma 34.

Faauta foi, ua nonofo i le au ala tagata tauaso e toalua, ua la faalogo ua maliu ane Iesu, ona la alalaga mai ai lea, ua faapea mai, Le Alii e, le alo o Tavita, ia e alofa mai ia te i maua. . . . Ona mutimuti vale ai lea o le alofa o Iesu, ua pa'i atu i o la mata; ona vaai loa ai lea o la mata, ona la mulimuli mai ai lea ia te ia.

Iesu Keriso O Le Ali'i O Lē Na Ia Faia Mea Uma

Kolose, 1:16.

Auā na faia e ia o mea uma lava,
o mea i le lagi ma mea i le lalolagi,
o mea o vaaia ma mea e le o vaaia,
o nofoālīi, ma alii, ma alii sili, ma
faipule; na faia e ia mea uma lava,
na faia foi mo ia.

Eperu, 1:2.

Ua fetalai mai o ia ia i tatou i
nei ona aso e gata ai e lona Alo, o
le ua tofia e ia e fai mea uma lava
mona tofi, na ia faia foi e ia mea
uma.

Ioane, 1:3.

Na ia faia mea uma lava; e leai
foi se mea e tasi na faia e lei faia e
ia.

Roma, 14:9.

Auā o le mea lava lea na maliu
ai Keriso, ma ua toe tu mai ai, ma
ua soifua ai, ina ia faia o ia ma Alīi
i e ua oti atoa ma e o ola.

Galuega, 2:36.

O lenei foi, ia matuā iloa e le
aiga uma o Isaraelu, o Iesu lava
lena na faasatauroina e outou, ua
faia lea e le Atua ma Alīi ma
Keriso.

I. Korinito, 1:9.

E faamaoni le Atua, ua
valaauiina outou e ia ina ia mafuta
faatasi ma Lona Alo o Iesu Keriso
lo tatou Alīi.

Roma, 14:10

O oe na, se a le mea e te faasala ai i lou uso? o oe na foi, pe se a le mea e te ta'ufaatauvaaaina ai lou uso? auā tatou te laulaututū uma lava i luma o le nofoa faamasino o Keriso.

Mataio, 25:32.

E faapotopotoina foi i ona luma o nuu uma lava; ona tuueseeseina lea o i latou e ia, e pei o le leoleo mamoe ona tuueseeseina o mamoe ma 'oti.

Ioane, 5:22.

Auā e le faamasino e le Tamā i se tasi, a ua ia tuu mai i le Atalii, le faamasinoga uma lava.

Roma, 2:16.

A e faasalaina i latou i le aso e faamasinoina ai e le Atua e Iesu Keriso mea lilo a tagata, e tusa ma la'u tala lelei.

II. Timoteo, 4:1.

O lenei ou te matuā fai atu ia te oe i luma o le Atua me le Alii o Iesu Keriso, o le na te faamasinoina o e ola atoa ma e ua oti, pe a oo i lona faaali mai ma lona malo.

Galuega, 10:42.

Ua na poloai mai foi ia te i matou e tala'i atu i le nuu, ma molitino atu, o ia lava le ua tofia e le Atua e fai ma faamasino i e o ola ma e ua oti.

O Le Faaolataga E Na Keriso Lava

Eperu, 5:9.

Ona avea ai lea o ia ma tupuga o
le ola e faavavau ia i latou uma o e
usiusitai ia te ia.

Eperu, 7:25.

O le mea foi lea e mafai ai ia te
ia ona faaola pea lava i e
faalatalata atu i le Atua ona o ia,
auā o loo soifua pea ia e fautua mo
i latou.

Galuega, 4:12.

E leai foi se tasi ua i ai le ola; e
leai lava se isi igoa i lalo o le lagi
ua foaiina mai i tagata e mafaia
ona faaolaina ai o i tatou.

Ioane, 10:9.

O a'u nei o le faitotoa; afai e ui
mai se tasi ia te au, e faaolaina ia,

e alu atu ma ulu fafo, e maua foi e
ia le mea e 'ai.

Ioane, 14:6.

Ua fetalai atu Iesu ia te ia, O
a'u nei le ala, ma le upu moni, ma
le ola; e le alu atu lava se tasi i le
Tamā, pe a le ui mai ia te au.

Ioane, 8:24.

O lea ua ou fai atu ai ia te outou,
E oti outou i a outou agasala; auā
a outou le talitonu, o a'u lenei o ia,
ona oti lea o outou i a outou
agasala.

I. Tesalonia, 5:9.

Auā e lei tofia i tatou, e le
Atua i le toasa, a ia maua le ola
ona o lo tatou Alii o Iesu Keriso.

Kolose, 1:12-14.

O loo faafetai atu i le Tamā ua na saunia i tatou ia tatau ona tofusia i tatou i le tofi o le au paia o i le malamalama; o ia ua na laveai mai ia te i tatou nai le pule a le pouliuli, a ua na aumaia i tatou i le malo o lona lava Alo pele; o ia ua tatou maua ai le togiola i lona toto, o le faamagaloina lea o agasala.

Luka, 19:10.

Auā ua sau le Atalii o le tagata e saili ma faaola i le na le iloa.

I. Korinito, 1:30.

A ua fua mai ia te ia ona i ai outou ia Keriso Iesu, o le ua avea ai mo tatou poto mai le Atua, o le

amiotonu foi, ma le paia, ma le faaolataga; ina ia faapei ona tusia.

Tito, 2:14.

O le na foaiina mai o ia e ia mo i tatou, e togiola a'i i tatou ai le solitulafono uma lava, ma ia faamamāina mai e ia e fai mona, o lona lava nuu, e maelega i galuega lelei.

Faaliga, 5:9.

Ua latou pepese foi i le pese fou, ua faapea atu, Ua tatau lava oe ina ia e tagoi le tusi, ma tatala i ona faamaufaailoga; auā na fasia oe, ua e faatauina foi i matou i lou lava toto mo le Auta, mai itu aiga uma, ma gagana eseese, ma nuu, atoa ma atu nuu.

Roma, 5:9.

O lenei, ua ta'uamiotonuina nei i tatou i lona toto, e le faaolaina ea i tatou e ia ai le toasa i se a?

Efeso, 1:7.

O ia foi ua tatou maua ai le togiola i lona toto, o le faamagaloina o agasala, e tusa ma le oloa faulai o lona alofa tunoa.

I. Ioane, 1:7.

A e afai tatou te savavali i le malamalama, faapei ona i ai o ia i le malamalama, ona tatou mafuta faatasi ai lea o le tasi ma le tasi, o le toto foi o Iesu Keriso lona Alo e faamamāina ai i tatou i agasala uma lava.

I. Peteru, 1:18, 19.

Auā ua outou iloa e lei togiolaina outou i mea e pala, o le ario po o le auro, nai la outou amio le aoga na tuuina mai e o outou tamā; a o le toto tāua o Keriso pei o lo le tamai mamoe e le ponā lava, e leai foi sona leaga.

E Peru, 9:14.

E le sili ea ona faamamāina o outou loto fuatia ifo ai galuega e oti ai, i le toto o Keriso, o le na avatua o ia e ia e le Agaga e faavavau e fai ma taulaga e le ponā i le Atua, ina ia outou auauna i le Atua soifua?

Efeso, 2:8,9.

Auā o le alofa tunoa ua faaolaina ai outou i le faatuatua; e le mai ia te outou foi lea, a o le mea ua foaiina mai e le Atua; e le ona o galuega, ina ne'i mitamita se tasi.

Roma, 5:1.

O lenei, ua ta'uamiotonuina i tatou i le faatuatua, o lea ua tatou lelei ai ma le Atua, ona o lo tatou Alii o Iesu Keriso.

Kalatia, 5:6.

Auā e leai se aoga o le peritome po o le le peritomeina i e o ia Keriso Iesu, tau lava o le faatuatua e matuā galue i le alofa.

I. Ioane, 5:6.

Auā o i latou uma o e fanau mai

i le Atua, e manumalo i latou i le lalolagi; o lenei foi le manumalo e manumalo ai i le lalolagi, o lo tatou faatuatua lava.

Ioane, 20:31.

A ua tusia ia mea, ina ia talitonu ai outou, o Iesu o le Keriso lava ia, o le Alo o le Atua; ina ia maua ai foi le ola i lona suafa e outou o e talitonu.

Ioane, 6:28, 29.

Ona faapea mai lea o i latou ia te ia, Se a se mea matou te faia, ina ia matou galulue i galuega a le Atua? Ua tali atu Iesu, ua faapea atu ia te i latou, O lenei le galuega a le Atua, ia outou faatuatua ia te ia ua auina mai e ia.

Salamo, 103:11.

Auā e pei ona maualuga o le lagi i le lalolagi, e faapea ona tele o lona alofa i e matatau ia te ia.

Salamo, 103:17.

A o le alofa o Ieova, mai le vavau lava lea, e oo i le faavavau i e matatau ia te ia; o lana amiontu foi e oo i le fanau a latou fanau.

Mika, 7:18.

O ai ea se Atua e tusa ma oe o le faamagalo agasala, ma ua le manatua solitulafono a e o totoe o lona tofi? Na te le faamoemoe pea i lona toasa, auā e fiafia o ia i le alofa.

Salamo, 108:4.

Auā ua sili lou alofa i le maualuga o le lagi, o lou faamaoni foi ua oo i ao.

Auega, 3:22, 23.

O le alofa o Ieova ua le faaumatia ai i tatou, ona ua le mavae o lona alofa mutimutivale; e fou mai ia i taeao uma; e tele lou faamaoni.

Tito, 3:5

Ona faaola mai ai lea o ia ia i tatou, e le ona o galuega o i le amiontu sa tatou faia, a e tusa ma lona lava alofa i le faataeleina i le toefuataiina ma le faafouina e le Agaga Paia.

Naunauta'iga O Le Atua Ina Ia Tatou O Atu Ia Te Ia

13

Ua fetalai mai le Agaga ma le faatoanofotane, Ina sau ia; ina fai atu foi ia o lē faalogo, Ina sau ia; o lē fia inu, ina sau ia, atoa ma lē manao i ai, ina ave fua ia le vai o le ola.

—Faaaliga, 22:17.

Mataio, 11:28.

Ia outou o mai ia te au, o outou uma o e tigaina ma mafatia i avega, o a'u foi e malolo ai outou.

Ioane, 7:37.

O le toe aso, o le aso tele o le tausamiga, ua tulai ai Iesu, ma alaga, ua faapea atu, Afai e fia inu se tasi, ina sau ia ia te au e inu ai.

Isaia, 55:1.

E! outou uma o e fia inu, o mai ia i le vai, atoa ma outou ua leai ni

tupe, o mai ia, ina faatau ma aai; ia outou o mai lava, ma faatau le uaina ma le suasusu, a e leai se tupe, e leai foi se tau e faatau a'i.

Isaia, 1:18.

O loo o faapea mai Ieova, O mai ia, ina tatou filifili ia, e ui lava ina pei o ofu mūmū a outou agasala, e sisina ia e pei o le kiona; e ui lava ina mūmū ia e pei o le ie ulaula, e avea e pei o fulfulu mamoe.

II. Korinito, 5:20.

O lenei, o sāvali i matou a Keriso, peiseai ua aioi mai le Atua ia te outou e i matou; matou te ole atu, o sui i matou o Keriso, ia outou lelei ma le Atua.

14 O Tagata Uma E Le O Le Fanau A Le Atua

I. Ioane, 3:10.

O le mea lea ua iloa ai le fanau a le Atua ma le fanau a le tiapolo. O i latou uma o e le fai le amiontu, e le mai le Atua i latou, atoa ma ē le alolofa i o latou uso.

Roma, 8:14, 15.

Auā o i latou uma ua ta'ita'iina e le Agaga o le Atua, o atalii i latou o le Atua. Auā ua outou le maua le agaga o le pologa, e toe fefefe ai; a ua outou maua le Agaga o tamafai, tou te valaau atu ai, Ava, le Tamā e.

Ina ia avea outou ma e ua le mata'uleagaina, ma e ua sao le amio, o le fanau a le Atua, e le ponā i luma o le tupulaga amio

faapiopio ma le finau vale; ua pupula ia te i latou la outou amio, faapei o mea e faamalamalama a'i le lalolagi. —Filipi, 2:15.

Ioane, 1:12.

A o i latou uma e na talia o ia, ma faatuatua i lona suafa, na ia avatu i ai o lea manuia, ia avea i latou ma fanau a le Atua.

II. Korinito, 6:17, 18.

O lea ia o mai ai outou nai totonu ia te i latou, ma ia outou vavae mai, ua fetalai mai ai le Alii, aua foi tou te papai atu i se mea leaga; ona ou talia ai lea o outou, e fai foi a'u mo outou Tamā, e fai foi outou mo'u atalii ma o'u afafine, ua fetalai mai ai le Alii e ona le malosi uma lava.

O Le A Se Fetalaiga A Le Atua I Mea Inu Malolosi

15

Kalatia, 5:19-21.

Ua iloa tino foi galuega a le tino, o mea faapenei; o le mulilua, o le faitaaga, o le amio leaga, o le mataītu, o le ifo i tupua, o le fai togafiti faataulāitu, o le feitagai, o le femisai, o le losilosi vale, o le lotoa, o le finau vale, o le fevae-vaeaiga, o maseiga, o le mataua, o le fasioti tagata, o le onaga, o le puola, ma mea faapena; ou te muai ta'u atu nei ia te outou, pei ona ou fai atu anamua, o e faia mea faapena, e le fai le malo o le Atua mo latou tofi.

Isaia, 5:11.

Oi talofa ia te i latou o e ala usu

e matuā saili 'ava, ma ua nonofo pea ua oo i le po, seia faavalemalolosi ai i latou i le uaina.

Roma, 13:13, 14.

Ia tatou savavali ma le matagofie e tuna i le ao; aua le poula ma le onā, aua le faitaaga ma le mataītu, aua le femisai ma le mataua. A ia outou oofu i le Alii o Iesu Keriso; aua foi le sauniuni mo le tino, e oo ai ona tu'inanau.

Faataoto, 23:31, 32.

Aua e te vaai i le uaina pe a mūmū mai; pe a pupula mai i le ipu, e alualu sa'o ifo ia. E mulimuli ane e feū ia, pei se gata; e pei o le gata uogo lona tui.

Mataio, 22:37, 38.

Ona fetalai atu ai lea o Iesu ia te ia, E te alofa atu l le Alii lou Atua ma lou loto atoa, ma lou agaga atoa, ma lou manatu atoa. O le poloaiga muamua lena ma le sili.

Ua maliu ane ia i le ala, ona momo'e mai ai lea o le tasi, ua tootuli ia te ia, ma fesili mai ia te ia, Le a'oa'o lelei e, se a se mea ou te faia ina ia ou maua ai le ola e faavavau? A ua fetalai atu Iesu ia te ia, Se a le mea e te ta'ua mai ai a'u ua lelei? e leai se tasi e lelei, na o le toatasi lava, o le Atua lea. Ua e iloa tulafono, Aua e te mulilua; aua e te fasioti tagata; aua e te gaoi; aua e te molimau pepelo; aua

e te agaleaga; ia e ava i lou tamā ma lou tinā. Ona tali mai lea o ia, ua faapea mai ia te ia, Le a'oa'o e, ua ou tausia na mea uma, talu ina ou itiiti. Ua silasila atu Iesu ia te ia, ua alofa atu ia te ia, ua fetalai atu foi ia te ia, E tasi le mea e le o ia te oe. Ina alu ia, faatau atu au mea uma, ma avatu i e ua matitiva, ona e maua lea o le oa i le lagi; i le ē sau ai, ma ave le satauro, a e mulimuli mai ia te au. Ona faanoanoa lea o ia ona o lea upu, ua alu ese foi ma le tiga, auā ua tele ana oloa. —Mareko, 10:17-22.

O i ai le ala ua tonu i le manatu o le tagata; a o lona taunuuga, o ala ia e oti ai. —Faataoto, 16:25.

Efeso, 5:6.

Aua ne'i faaseseina outou e se tasi i upu faatauvaa; auā o mea ia e oo mai ai le toasa o le Atua i e faalogogata.

I. Korinito, 6:9, 10.

Tou te le iloa ea, o e amio leaga e le fai mo latou tofi le malo o le Atua? Aua ne'i faaseseina outou; o e faitaaga, ma e ifo i tupua, ma e mulilulua, ma e tauātane, ma e faasotoma, ma e gaoi, ma e matapeapea, ma e onā, ma e agatele, ma e fao mea, e le fai mo latou tofi le malo o le Atua.

Iakopo, 1:22.

A ia fai outou ma e anaana i le upu, a e aua le na ona faalogologo

i ai, o faaseseina ai outou e outou.

I. Ioane, 3:7, 8.

Le fanau e, aua ne'i faasese se tasi ia te outou; o lē fai le amiontonu, o le amiontonu lea, faapei ona amiontonu o ia. O lē fai le agasala, mai le tiapolo lava ia; auā ua agasala le tiapolo talu le amataga. . . .

Kalatia, 6:3.

Auā pe a manatu se tasi o le tagata aoga ia, a e leai, ua pelogia o ia e ia i lona manatu.

Kalatia, 6:7.

Aua ne'i faaseseina outou, e le ulagia le Atua auā o le mea e luuina e le tagata, o le mea lava lea e seleseleina mai ai e ia.

O Le Agasala Ua O'o Mai Ai le Oti

Roma, 5:12.

O lenei, faapei ona oo mai o le agasala i le lalolagi i le tagata e toatasi, o le oti foi ona o le agasala, ona oo mai ai lea o le oti i tagata uma lava, auā ua agasala uma lava.

Iakopo, 1:15.

Pe a to le tu'inanau ona fanau mai ai lea o le agasala; a matua le agasala ona fanaua mai ai lea o le oti.

Roma, 8:6.

Auā o le loto i la le tino o le oti lea; a o le loto i la le Agaga o le ola lea ma le manuia.

Esekielu, 18:20.

O le tagata e agasala e oti lava ia; e le tauia le agasala a le tamā i le atalii, e le tauia foi le agasala a le atalii i le tamā; o le amiontu a le ua amiontu e i ona luga lava lea, o le amio leaga foi a le ua amio leaga e i ona luga lava lea.

Luka, 15:32.

Ua tatau foi ona tatou fiafia ma olioli, auā o lou uso lena na oti, a ua toe ola mai; na le iloa foi, a ua maua.

Faataoto, 11:19.

E pei ona iu o le amiontu i le ola, e faapea foi le ua tausisi i le leaga, e iu lea i lona lava oti.

Luka, 7:14, 15.

Ua maliu ane ia, ua pa'i atu i le fata; ona tutū mai ai lea o le au fata, ona fetalai atu lea o ia, Le taulealea e, ou te fai atu ia te oe, Ina tulai ia. Ona nofo ai lea i luga o le na oti, ua tautala. . . .

Ua ia fetalai atu ia upu, ona alaga lea o ia ua leo tele, Lasalo e, ina sau ia i fafo. Ona alu ai lea i fafo o le na oti, ua fusifusia ona vae ma ona lima i ie na tanuma'i, ua fusi foi ona mata i le solosolo. Ona fetalai atu lea o Iesu ia te i latou, Tatala ia ia te ia, ina tuu atu ia e alu. —Ioane, 11:43, 44.

Ioane, 10:17, 18.

O le mea lea e alofa mai ai le

Tamā ia te au, auā ou te tuuina atu lo'u ola, ina ia ou toe au mai ai. E leai se tasi na te aveeseina ia te au, a e peitai a'u, ou te tuuina atu e a'u lava. O ia te au le pule e tuuina atu, o ia te au foi le pule e toe au mai ai; ua ou maua lena poloaiga mai lo'u Tamā.

Faaaliga, 1:18.

O lē ola nei lava, sa ou oti, faauta foi, ou te ola e faavavau faavavau lava; Amene, o ia te au foi ki o seoli ma le oti.

Ioane, 11:25.

Ua fetalai atu Iesu ia te ia, O a'u nei o le toe tu ma le ola; o lē faatuatua mai ia te au, e ui lava ina oti, a e ola lava ia.

O Poloa'iga A Le Atua

Teuteronome, 5:7-21.

Aua ne'i e fai mo oe ni atua ese i o'u luma.

Aua e te fai mo oe se tupua ua ta, o se faatusa lava o se mea o i le lagi i luga, po o i le fanua i lalo, po o i le sami o i lalo o le fanua; aua e te ifo i ai, aua foi e te auauna i ai....

Aua e te ta'u fua le suafa o Ieova lou Atua; auā e le faasaoina e Ieova o le ta'u fua i lona suafa.

Ia e tausi le aso sapati ina ia faapaiaaina; faapei ona poloai mai ai o Ieova lou Atua ia te oe. O aso e ono e te galue ai, ma fai ai au

galuega uma lava: a o le aso fitu o le sapati lea ia Ieova lou Atua....

Ia e ava i lou tamā ma lou tinā, pei ona poloai mai ai o Ieova lou Atua ia te oe....

Aua e te fasioti tagata.

Aua foi e te mulilua.

Aua foi e te gaoi.

Aua foi e te mōlimau pepelo i se tasi.

Aua foi e te manao i le avā a le lua te tuaoi, aua foi e te manao i le fale o le lua te tuaoi, o lona fanua, po o lana auauna tane, po o lana auauna fafine, o lana povī, po o lana asini, po o se tasi mea a le lua te tuaoi.

Auā ua silasila o ia ala o tagata taitoatasi, ua ia silafia foi ona savaliga uma. E leai se pouliuli, e leai foi se ata o le oti e lalafi ai o e fai amio leaga. —Iopu, 34:21, 22.

Salamo, 139:8 ma 12.

Afai ou te alu ae i le lagi, o i ai lava oe; afai ou te fofola so'u moega i seoli, faauta, o i ai lava oe. . . . Auā o le pouliuli e le pouliuli lava lea ia te oe; e malamalama le po pei o le ao; e tusa lava ia te oe le pouliuli ma le malamalama.

Ieremia, 23:24.

Pe mafai ea e se tagata ona lafi i mea lilo, ou te le iloa ai o ia? o loo fetalai mai ai Ieova. E le o tutumu

ea le lagi ma le lalolagi ia te au? o loo fetalai mai ai Ieova.

Faataoto, 15:3.

O loo i mea uma lava fofoga o Ieova; o loo matuā silasila i e amio leaga ma e amio lelei.

Luka, 8:17.

Auā e leai se mea lilo e le faaalia; e leai foi se mea natia e le faailoa, a e iu ina faaalia.

E le lilo foi se tasi mea na faia i ona luma, a ua taatia fua ma ua aliali mai o mea uma lava i lana silafaga, tatou te ta'u atu ia a tatou amio. —Eperu, 4:13.

I. Korinito, 3:20.

Ua silafia e le Alii manatunatu o e popoto, ua faatauvaa ia.

22 Faasalaga E Faavavau O Le Tagata Amioleaga

Mataio, 13:41, 42.

E aauina atu e le Atalii o le tagata ana agelu, latou te faapotopotoina nai lona malo mea uma e tausuai ai ma ē amio leaga. E lafoina i latou i totonu o le ogāumu aasa; e i ai le tagiaue ma le lilivau o nifo.

Mataio, 18:8.

Afai foi e te tausuai i lou lima po o lou vae, ina tutū ese ia, ma e lafoai; e lelei ona e sao i le ola a ua lima mutu, pe pipili, a e leaga pe a lafoina oe i le afi e faavavau ma ou lima e lua ma ou vae e lua.

II. Peteru, 3:7.

A o le lagi nei ma le lalolagi ua tuu ona o lea lava afioga, ia taofia

mo le afi i le aso e faamasino ai ma fano ai tagata faalematau.

Salamo, 9:17.

E tulia i seoli o e fai amio leaga, o nuu uma lava o e faagalagalo i le Atua.

Mataio, 25:46.

Ona o atu ai lea o i latou nā i le sala e faavavau; a o e amiontu e o atu i le ola e faavavau.

II. Tesalonia, 1:8, 9.

I le afi mumū, na te taui ma sui i e ua le iloa le Atua, ma ua le anaana i le tala lelei a lo tatou Alii o Iesu Keriso; e faasalaina i latou lava i le fanoga e faavavau lava, ia te'a ma le Alii ma le mamalu o lona malosi.

Auā ua faatuina e ia le aso e faamasinoina ai le lalolagi ma le tonu, e le tagata ua tofia e ia; o loo faamaoni mai ai e ia i tagata uma lava i lona toe faatu mai ia te ia i e ua oti.

—Galuega, 17:31.

Ua silafia e le Alii se mea e laveai mai ai i e amio Atua ai le faaosoosoga, a e taofi i e amio leaga e oo i le aso faamasino ina ia faasalaina i latou.

—II. Peteru, 2:9.

O le mea lava lenei ua atoatoa ai le alofa ia te i tatou, ina ia tatou maua le faamalosi i le aso o le faamasinoga; auā e pei o ia, e faapea foi i tatou i lenei lalolagi.

—I. Ioane, 4:17.

Pei ona tofia foi mo tagata ia tasi lo latou oti, a e mulimuli ane o le faamasinoga. —Eperu, 9:27.

Auā tatou te tutū atu uma lava i luma o le nofoa faamasino o Keriso e tatau ai; ina ia taitasi ma talitali i mea na faia i le tino, e pei o mea na faia, pe lelei pe leaga.

—II. Korinito, 5:10.

Na a'u iloa foi o e na oti, o tagatānuu atoa ma alii, o tutū i luma o le Atua, ona fofola lea o tusi; ua fofola foi ma le tasi tusi, o le tusi lea o le ola; ona faamasinoina ai lea o e na oti i mea ua tusia i tusi, e tusa ma a latou amio.

—Faaaliga, 20:12.

O Le Alofa Tunoa O Iesu Keriso

Galuega, 4:33.

Ua molitino atu e le au aposetolo ma le mana tele i le toe tu mai o le Alii o Iesu; ua alofateleina foi i latou uma.

Roma, 9:16.

O lenei, e le mai le ua manao, e le mai le ua tausinio, a e mai le Atua o lē alofa mai.

I. Peteru, 5:5.

... E tetee atu le Atua i e faa-maualuga, a e foaiina mai le alofa tunoa i e faamaulalo.

Roma, 5:15.

A e le pei o le agasala le mea e foaifuaina mai; auā afai ua oti le toatele i le agasala a le toatasi, e faasilisili lava i le toatele le alofa

tunoa o le Atua, ma le mea e foaifuaina mai i le alofa tunoa, ua i le tagata e toatasi, o Iesu Keriso lea.

II. Korinito, 9:15.

Faafetai i le Atua i lana mea foai fua e le mafaamatalaina.

II. Korinito, 8:9.

Auā ua outou iloa le alofa tunoa o lo tatou Alii o Iesu Keriso, sa tamaoaiga ia, a ua faamativaina ona o outou, ina ia faatamaoai-gaina outou i lona mativa.

Tito, 3:7.

Ina ia ta'uamiotonuina i tatou i lona lava alofa tunoa, ia fai i tatou ma suli e tusa ma le faamoemoe i le ola e faavavau.

Na faapalepale le Atua i ona po
o le vālea; a o loo fetalai mai nei i
tagata uma i nuu uma lava ia salamo.

—Galuega, 17:30.

Ou te fai atu ia te outou, e leai; a
e afai tou te le salamo, e faapena
lava ona fano outou uma.

—Luka, 13:3.

O lenei, ina salamo ia outou ma
outou liliu, ina ia sōloiesea a
outou agasala, ina ia oo mai ai o
tausaga e filemu ai mai luma o le
Alii.

—Galuega, 3:19.

Ona fai atu lea o Peteru ia te i
latou, Ina salamo ia, ma ia taitasi
ma papatisoina outou uma i le
suafa o Iesu Keriso, mo le
faamagaloina o agasala; ona

maua lea e outou o le mea foai fua
mai, o le Agaga Paia lea.

—Galuega, 2:38.

Ina salamo ia outou; auā ua
latalata mai le malo o le lagi.

—Mataio, 3:2.

Auā o le tiga e tusa i le Atua e
tupu ai le salamo e oo i le ola e le
toe salamo ai; a o le tiga faalela-
lolagi e tupu ai le oti.

—II. Korinito, 7:10.

Ou te fai atu ia te outou, e
faapea foi ona tele o le olioli i le
lagi i le tagata agasala e toatasi e
salamo, a e itiiti i e amiontonu e
toaivagafulu ma le toaiva e le
tusa i ai le salamo.

—Luka, 15:7.

O Le Faamagaloina O Agasala

Mataio, 6:14.

Auā afai tou te faamagaloina atu tagata i a latou agasala, e faamagaloina foi outou e lo outou Tamā o i le lagi.

Esekielu, 18:21.

A e afai e liliu ese le ua amio leaga ai ana agasala uma ua na faia, ma tausi i a'u tulafono uma, ma faia e ia le amio tatau ma le amiontonu, e ola lava ia, e le oti.

Faaaliga, 3:20.

Faauta, ou te tu atu i le puipui ma tu'itu'i atu; ai se tasi e faalogo mai i lo'u leo, ma tatala mai le puipui, ou te ulufale atu ia te ia, ma te tali sua foi ma ia, o ia foi ma a'u.

Isaia, 55:7.

Ia lafoai e le ua amio leaga lona ala, ma le tagata agasala ia lafoai e ia ona manatu; a ia foi mai ia Ieova, ona alofa mai lea o ia ia te ia; ia foi mai i lo tatou Atua, auā na te matuā faamagaloina.

Galuega, 5:31.

O ia ua aveina ae e le Atua i lona aao taumatau o le Alii i le ma le Faaola, na te avatua ia Israelu le salamo ma le faamagaloina o agasala.

Mareko, 2:5.

Ua silafia e Iesu lo latou faatuatua, ona fetalai atu lea o ia i le supa, Lo'u atalii e, ua faamagaloina au agasala.

Tito, 2:11, 12.

Aua o le alofa tunoa o le Atua ua au mai ai le olataga, ua faaalia mai lea i tagata uma lava, o loo a'oa'o mai ai ia te i tatou, ia tatou tete'a ese ma le faalematau atoa ma tu'inanau faalelalolagi, a ia tatou nonofo ma le faautauta ma le amiontu atoa ma le amio Atua i lenei olaga.

Kolose, 3:2.

Ia outou loto lava i mea i lugā, a e le o mea i le lalolagi.

Efeso, 5:11.

Aua foi tou te amio faatasi ma galuega le aoga a le pouliuli, a e lelei ona outou aoai atu.

Isaia, 1:16.

Inafafano ia outou, ina faamamā ia outou; faate'a ese ia a outou galuega leaga i o'u luma, soia tou te fai mea leaga.

I. Ioane, 2:15, 16.

Aua tou te mananao i le lalolagi, po o mea o i ai i le lalolagi. Pe afai e manao se tasi i le lalolagi, e le o ia te ia le alofa i le Tamā. Auā o mea uma lava o i le lalolagi, o le tu'inanau o le tino, ma le tu'inanau o mata, ma le faalialia o lenei olaga, e le mai le Tamā ia, a e mai le lalolagi.

... O lenei, o sē fia uo ma le lalolagi, ua avea o ia ma ita i le Atua.
—Iakopo, 4:4.

Esekielu, 36:26.

Ou te avatu foi ia te outou le loto fou, ma ou tuu i totonu ia te outou le agaga fou; ou te aveesea le loto maaa ai o outou tino, ma ou avatu ia te outou le loto aano.

I. Ioane, 2:29.

Afai ua outou iloa o lē amiontonu ia, ua outou iloa ai o i latou uma o e fai le amiontonu ua fanau mai i latou ia te ia.

O lenei, afai o ia Keriso se tasi, o le tagata fou ia; ua mavae mea tuai, faauta, ua faafouina mea uma.

—II. Korinito, 5:17.

Ioane, 10:10

... ua ou sau ina ia latou

maua le ola, ia maua atili ai lava.

I. Ioane, 5:18.

Ua tatou iloa e le agasala se tasi o e ua fanau mai i le Atua; a o le ua fanau mai i le Atua, e tausi o ia e ia, e le tago foi loo leaga ia te ia.

Ioane, 3:3.

Ua tali atu Iesu, ua faapea atu ia te ia, E moni, e moni, ou te fai atu ia te oe, a le toe fanau le tagata, e le mafai ona iloa e ia o le malo o le Atua.

I. Peteru, 1:23.

Ua fanaufouina outou e le o le fua e pala, a o le fua e le pala lava, o le afioga a le Atua lea ua ola ma ua tumau e oo i le faavavau.

Kalatia, 5:24.

A o e o ia Keriso, ua faasatau-roina e i latou le tino, ma ona manao, ma ona tu'inanau.

Efeso, 2:1 ma 6.

O outou foi lava o e na oti i amio leaga ma agasala, . . . ua na toe faatutū faatasi mai foi, ma faanononofo faatasi i tatou ma Keriso Iesu i mea o i le lagi.

Kolose, 3:1-3.

O lenei, afai ua toe faatuina outou faatasi ma Keriso, ia outou saili i mea o i lugā, o i ai Keriso, o loo tietie i le itu taumatau o le Atua. Ia outou loto lava i mea i lugā, a e le o mea i le lalolagi; auā ua

oti outou, ua lilo foi lo outou ola faatasi ma Keriso i le Atua.

I. Peteru, 2:24.

O le na aveina e ia lava a tatou agasala i lona lava tino i luga i le laau, ina ia tete'a outou ma agasala, tatou te nofo ai i le amiontonu, O ona faalavalava ua malolo ai i tatou.

Roma, 6:2 ma 11.

O i tatou ua oti i la le agasala, pe faapefea ona tatou ola pea i ai? . . . Ia faapea foi la outou taofi, ua outou oti i la le agasala, a ua outou ola lava i la le Atua i lo tatou Alii o Keriso Iesu.

Kalatia, 6:8.

O sē lulu i la lona tino, e selesele mai ai e ia i la le tino le mea e pala; a o sē lulu i la le Agaga, e selesele mai ai e ia i la le Agaga le ola faavavau.

Ioane, 3:14, 15.

E pei ona siitia i luga e Mose o le gata i le vao, e ao ina faapea ona siitia i luga o le Atalii o le tagata: ina ia le fano le tasi e faatuatua ia te ia, a ia maua le ola e faavavau.

Ioane, 17:3.

O le ola e faavavau foi lenei, ia latou iloa oe le Atua moni e toatasī, atoa ma le ua e auina mai, o Iesu Keriso lea.

E moni, e moni, ou te fai atu ia te outou, o lē faalogo mai i la'u upu, ma talitonu ia te ia na na auina mai a'u, ua ia te ia le ola e faavavau; e le oo foi ina faasalaina o ia, a ua oo atu ia i le ola, sa i le oti.

—Ioane, 5:24.

Roma, 6:23.

Auā o le oti, o le totogi lea o le agasala; a o le ola e faavavau, o le mea foaifuaina mai lea e le Atua, i lo tatou Alii o Keriso Iesu.

Ioane, 3:36.

O lē faatuatua i le Alo, ua ia te ia le ola e faavavau; a o le le faatuatua i le Alo e le iloa e ia le ola, a o le toasa o le Atua o loo tu-mau lava i ona luga.

Isaia, 32:17.

O le mea e tupu i le amiontu o
le manuia lea; e tupu mai foi i le
amiontu le filemu ma le sao-
galemu e faavavau.

Kalatia, 4:6.

O atalii outou, o le mea lea ua
auina mai ai e le Atua le Agaga o
lona Alo i o outou loto, o valaau,
Ava, le Tamā e.

Ioane, 14:21.

O le ua ia te ia a'u poloaiga ma
tausi i ai, o ia lea e alofa mai ia te
au; o lē alofa mai foi ia te au, e alo-
faina o ia e lo'u Tamā; ou te alofa
foi ia te ia, ma ou faaali ia te ia.

Roma, 8:16.

O loo molimau mai lea lava

Agaga i o tatou agaga, o fanau i
tatou a le Atua.

I. Ioane, 3:18, 19.

La'u fanau e, aua ne'i tatou
alolofa tau o le upu ma le gutu, a o
le amio ma le faamaoni. O le mea
foi lea ua tatou iloa ai ua i le upu
moni i tatou, e mautinoa foi o
tatou loto i ona luma.

O le mea lava lenei ua tatou iloa
ai ua tumau i tatou i totonu ia te
ia, o ia foi i totonu ia i tatou, auā o
lona Agaga ua ia foaiina mai ia te
i tatou.

—I. Ioane, 4:13.

I. Ioane, 5:12.

O le o ia te ia le Alo, o ia te ia le
ola; o le e le o ia te ia le Alo o le
Atua, e le o ia te ia le ola.

32 O Le Keriso O Loo Afio I Totonu E Maua Mai Ai Le Olioli

O lenei, ou te alu atu ia te oe, ou te fai atu foi nei mea a o ou i le lalolagi, ina ia maua e i latou lo'u olioli ia atoatoa ai i totonu ia te i latou.

—Ioane, 17:13.

Ua faasatauroina faatasi i maua ma Keriso; a e ou te le toe ola a'u, a o Keriso o loo ola i totonu ia te au; o le ola foi ou te ola ai nei i le tino, ou te ola ai lava i le faatuatua i le Alo o le Atua, o le na alofa mai ia te au, ma foaiina mai o ia e ia e fai mo'u sui.

—Kalatia, 2:20.

Auā o le malo o le Atua, e le o mea e 'ai ma mea e inu; a o le

amiotonu, ma le filemu, ma le olioli i le Agaga Paia.

—Roma, 14:17.

Ua ou fai atu nei mea ia te outou, ina ia tumau ai lo'u olioli ia te outou, ia atoatoa foi lo outou olioli.

—Ioane, 15:11.

Ua oo mai nei lava tou te lei ole atu i se mea i lo'u igoa; ina ole atu ia, ona outou maua ai lea, ina ia atoatoa ai lo outou olioli.

—Ioane, 16:24.

E te faailoa mai ia te au le ala o le ola; o i ou luma le fiafia e mālie ai; o i lou itu taumatau le olioli e faavavau.

—Salamo, 16:11.

I. Samuelu, 12:15.

A e afai tou te le faalogo i le siufofoga o Ieova, a e founvale outou i le afioga a Ieova, e oo atu le aao o Ieova ia te outou, e pei ona oo i o outou tamā.

Roma, 6:16.

Tou te lei iloa ea, o lē tou te tuuina atu i ai outou e fai ma auauna e anaana i ai, o ana auauna outou tou te anaana i ai, po o le agasala e oo ai le oti, po o le anaana e oo ai le amiotonu?

II. Tesalonia, 1:7-9.

E ia te outou foi o e puapua-gaina, o le mapusaga faatasi ma i

matou, pe a faaalia le Alii o Iesu mai le lagi, faatasi ma agelu o lona malosi, i le afi mumū, na te taui ma sui i e ua le iloa le Atua, ma ua le anaana i le tala lelei a lo tatou Alii o Iesu Keriso; e faasalaina i latou lava i le fanoga e faavavau lava, ia te'a ma le Alii ma le mamalu o lona malosi.

Teuteronome, 11:26-28.

Faauta mai, ou te tuuina atu i o outou luma i le aso nei le manuia ma le malaia; o le manuia pe afai tou te faalogo i poloaiga a Ieova lo outou Atua, ou te fai atu ai ia te outou i le aso nei; a o le malaia pe afai tou te le faalogo i poloaiga a Ieova lo outou Atua....

Filipi, 2:11.

**Ma ia ta'uta'a atu e laulaufaiva
uma lava o Iesu Keriso o le Alii
lava ia, ia iu ina viia ai le Atua le
Tamā.**

Mataio, 10:32, 33.

**O lenei, ai se na te ta'uta'u a'u i
luma o tagata, o a'u foi ou te
ta'uta'uina o ia i luma o lo'u Tamā
o i le lagi. Ai se faafiti foi ia te au i
luma o tagata, ou te faafitia foi o
ia i luma o lo'u Tamā o i le lagi.**

Roma, 10:9, 10.

**Afai e te ta'utino i lou gutu i le
Alii o Iesu, ma talitonu i lou loto
ua toe faatuina mai o ia e le Atua
nai e ua oti, e faaolaina ai oe; auā o
le loto e talitonu ai, e oo mai ai le**

amiontonu; a o le gutu e ta'utino ai,
e oo mai ai le ola.

I. Ioane, 2:23.

**Ai se faafiti i le Alo, e le o ia te
ia le Tamā; (o le ua ta'uta'ua le
Alo, ua ia te ia foi le Tamā).**

Luka, 9:26.

**Auā ai se mā ia te au ma a'u
upu, e mā foi ia te ia le Atalii o le
tagata, pe a sau o ia i lona
mamalu, ma lo le tamā, ma le au
agelu paia.**

I. Ioane, 4:2.

**O le mea lenei tou te iloa ai le
Agaga o le Atua, O agaga uma o e
ta'utino, ua maliu mai Iesu Keriso
i le tino, mai le Atua lava i latou.**

I. Peteru, 5:8.

Ia outou faautauta, ia outou mataala, ona o le ūa fai outou mona fili, o le tiapolo lea, o loo fealualuai o ia e pei o se leona tagi, ua saili se tasi e 'aina e ia.

Mataio, 4:1 ma 10, 11.

Ona aveina ae lea o Iesu i le vao e le Agaga, ina ia faaosoosoina e le tiapolo. Ona fetalai atu lea o Iesu ia te ia, Ina alu ese ia oe Satani; auā ua tusia, E te ifo atu i le Alii lou Atua, ua na o ia lava e te auauna i ai. Ona tuua ai lea o ia e le tiapolo, faauta foi, ua o mai agelu ma auauna mai ia te ia.

II. Tesalonia, 2:8, 9.

Ona faaalia mai ai lea o le ua

amio leaga, e fano o ia i le Alii, i le mānava mai o lona fofoga, ma faaumatia i le faaali mai o lana afio; o lona sau foi e pei o le galuega a Satani, i le mana uma, ma faailoga, ma vavega pepolo.

Ia oofu outou i ofutau atoatoa mai le Atua, ina ia outou mafaia ona tetee atu i togafiti a le tiapolo.

—Efeso, 6:11.

Ia liliu mai mai le pouliuli i le malamalama, mai le pule foi a Satani ia liliu i le Atua; latou te maua ai le faamagaloina o agasala, ma le tofi faatasi ma i latou ua faapaiaina i le faatuatua ia te au.

—Galuega, 26:18.

II. Tesalonia, 2:8.

Ona faaalia mai ai lea o le ua amio leaga, e fano o ia i le Alii, i le mānava mai o lona fofoga, ma faaumatia i le faaali mai o lana afio.

Lakopo, 4:7, 8.

O le mea lea ia outou gauai ai i le Atua; ia outou tetee atu i le tiapolo, ona sola ese ai lea o ia ia te outou. Ia outou faalatalata atu i le Atua, ona faalatalata mai lea o ia ia te outou. . . .

Eperu, 2:14.

O lenei, ina ua i ai i le fanau le tino tagata ola, na faapea foi ona ua i ai ia te ia, ina ia faaumatia e ia

i lona maliu o le ua i ai le malo e oti ai, o le tiapolo lea.

Roma, 8:35 ma 37.

O ai se na te faateaeseina mai i tatou i le alofa o Keriso? o le puapuaga ea, po o le atuatuvale, po o le sauia, po o le oge, po o le lavalavā, po o le pagatia, po o le pelu? . . . A ua tatou manumalo aiai i nei mea uma lava, ona o ia ua alofa mai ia te i tatou.

I. Ioane, 3:8.

O lē fia le agasala, mai le tiapolo lava ia; auā ua agasala le tiapolo talu le amataga. O le mea lava lea na faaalia mai ai le Alo o le Atua, ina ia faaumatia e ia galuega a le tiapolo.

I. Ioane, 4:20.

Pe afai e faapea mai se tasi, Ou te alofa i le Atua, a e ita i lona uso, o le pepelo lava ia; auā o le le alofa i lona uso ua ia vaai atu i ai, pe mafai faapefea ona alofa o ia i le Atua ua ia le vaai atu i ai.

I. Korinito, 13:1.

Afai ou te tautala i gagana a tagata atoa ma agelu, a e leai so'u alofa, ua avea a'u ma 'apa memea taalili, po o se sumepalo tagitagi.

Ioane, 13:35.

O le mea lea e iloa ai e tagata uma lava o o'u soo outou, pe afai ua outou fealofani.

Kalatia, 5:22, 23.

A o le sua o le Agaga o le alofa,

o le olioli, o le filemu, o le onosai, o le mataalofa, o le agalelei, o le faamaoni, o le agamalu, ma le le gaoiā

Ioane, 21:16.

Ua toe fetalai atu faalua o ia ia te ia, Simona e, le atalii o Iona, pe e te alofa mai ia te au? Ua fai mai o ia ia te ia, Ioe, le Alii e, ua e silafia, ou te alofa ia te oe. Ona fetalai atu lea o ia ia te ia, Ia e leoleo i a'u mamoe.

I. Ioane, 3:14.

O i tatou, ua tatou iloa ua oo i tatou i le ola sa i le oti, auā o loo alolofa i tatou i le au uso; o se le alofa i le uso, o loo tumau ia i le oti.

Galuega, 10:39-41.

O molimau foi i matou i mea uma lava na faia e ia i le nuu o Iutaia atoa ma Ierusalema; o le na fasiotia foi e i latou i lo latou faatautau i le laau. O ia na toe faatuina e le Atua i le aso tolu, ma na faaalitinoina o ia, e le o le nuu, uma lava, a o molimau na uluai filifilia e le Atua, o i matou nei lava sa matou aai ma feinu ma ia, ina ua toe tu mai o ia i e ua oti.

Roma, 4:25.

Na tuuina mai o ia ona o a tatou agasala, ma toe faatuina mai ina ia ta'uamionuina ai i tatou.

Ioane, 20:26-28.

Ua mavae aso e valu, ua toe faa-

tasi ona soo i le fale, ua faatasi ona soo i le fale, ua faatasi ai foi i latou ma Toma; ua maliu atu Iesu, a o pupuni faitotoa, ua tu foi o ia i totonu, ma fetalai atu, Ia outou manuia. Ona fetalai atu lea o ia ia Toma, Au mai ia lou tamata-mai lima iinei, vaai mai foi i o'u lima; au mai ia foi lou lima, ma tuu mai i lo'u itu; aua foi e te masalo vale, a ia e talitonu. Ona tali mai lea o Toma, ua faapea mai ia te ia, Lo'u Alii e, ma lo'u Atua e.

Ua tu mai o ia i le taeao lava o le uluai aso o le vaisapati, ona lua'i faaali lea o ia ia Maria le Makatala, o le na ia tuli ese ia te ia temoni e toafitu. —Mareko, 16:9.

O Le Toe Tu Mai, O Lo Tatou Faamoemoe Silisili

39

Mataio, 16:21.

O ona po ia na amata ai e Iesu ona faailoa atu i ona soo, e tatau ona alu o ia i Ierusalem, e faatigaina foi i mea e tele e toeaina ma le au faitaulaga sili, ma le au tusiupu, e fasiotia foi o ia, e faatuina foi o ia i le aso tolu.

Ioane, 5:25 ma 28, 29.

E moni, e moni, ou te fai atu ia te outou, e oo i le aso, ua oo nei foi i ai, e faalogo mai ai e ua oti i le leo o le Atalii o le Atua; o e faalogo ai foi, e ola ai i latou.... Aua tou te ofo i lenei mea, auā e oo mai le aso e faalogo ai i lona leo o i latou uma

ua i tuugamau, ma latou o mai ai; o e na amio lelei, e toe tutū i le ola; a o e na amio leaga, e toe tutū i le faasala.

Roma, 6:3-5.

Tou te lei iloa ca, o i tatou nei uma na papatisoina ia Keriso Iesu, na papatisoina i tatou i lona maliu? O lenei, ua tatanu faatasi i tatou ma ia i le papatisoga i lona maliu; ina ia tatou savavali i le ola toefuataiina, pei ona toe faatuina mai o Keriso nai e ua oti, i le mana o le Tamā. Auā afai ua faatasia i tatou i le faatusa i lona maliu, e faapea foi i tatou i lona toe tu mai.

I. Peteru, 1:2.

O e ua filifilia e tusa mona muai silafia e le Atua le Tamā, i le faapaiaina e le Agaga, ia iu ai i le gauai ma le saaluuga o le toto o Iesu Keriso; ia faateleina ia te outou le alofa tunoa ma le manuia.

Luka, 1:74, 75.

E foai mai ina ia laveaiina i tatou mai lima o e ita mai, tatou te le fefefe ai, a e auauna ia te ia ma le paia ma le amiotonu i ona luma i aso uma o lo tatou ola.

O lenei, le au pele e, ona ua ia te i tatou o ia upu ua folafolaina mai, ia tatou faamamā ia te i tatou i mea uma e leaga ai le tino atoa ma

le agaga, ia faaatoatoaina lo outou faapaiaina i le mata'u i le Atua. —II. Korinito, 7:1.

O lenei, ai se tasi e faamamā ia te ia ai nei mea, e fai o ia ma ipu e ta'uleleia, e faasaina, e aoga foi mo le alii, ua saunia mo galuega lelei uma. —II. Timoteo, 2:21.

A e pei ona paia o ia na valaauiina outou, ia faapea foi outou ona paia i a outou amio uma. —I. Peteru, 1:15.

Ia e taumafai ina ia avea oe ma le ua fiafia mai i ai le Atua, o le faigaluega e leai se mea e mā ai, na te vavaetonuina le upu moni.

—II. Timoteo, 2:15.

Mataio, 3:11.

O a'u nei, ou te papatiso atu ia te outou i le vai ina ia salamo; a e peitai o lē mulimuli mai e silisili o ia ia te au, e le aoga a'u ona tauave i ona see vae; o ia lea na te papatisoina atu ia te outou i le Agaga Paia ma le afi.

Isaia, 35:8.

E i ai foi le ala tanu, ma le ala, e ta'ua foi o le ala sa; e le ui atu ai se ua leaga, a e faia mo i latou lava; e ui ina valea se malaga e le sese ai lava.

Eperu, 13:12.

O lea na tiga ai Iesu i tua o le faitotoa o le aai, ina ia faapaiaina ai e ia o le nuu i lona lava toto.

I. Ioane, 1:9.

A e afai tatou te faaali a tatou agasala, e faamaoni o ia, ma le amiontu e faamagalo ai a tatou agasala, ma faamamā mai ia i tatou i amioletonu uma lava.

Efeso, 1:4.

Faapei ona ia filifili mai ia i tatou ona o ia, a o lei faavaeina le lalolagi, ina ia paia i tatou ma ia le mata'uleagaina i ona luma, i le alofa.

Eperu, 12:14.

Ia outou tausisi i le filemu ma tagata uma lava, i le ma le amio lelei, a aunoa ma lea, e leai se tasi na te iloa atu le Alii.

Luka, 11:13.

O lenei, o outou e leaga, afai ua iloa e outou ona avatu o mea lelei mā a outou fanau; e le sili ea ona foaiina mai e lo outou Tamā o i le lagi le Agaga Paia i e ole atu ai ia te ia?

Galuega, 1:8.

A e maua e outou le mana, pe a afio ifo le Agaga Paia i luga ia te outou; e fai foi outou ma molimau ia te au

Esekielu, 36:27.

Ou te tuuina atu lo'u Agaga i totonu ia te outou, tou te savavali ai i a'u tulafono, tou te anaana foi i a'u faamasinoga, ma outou faia.

Roma, 8:9.

A o outou, tou te le i la le tino, a e i la le Agaga, pe afai e nofo le Agaga o le Atua i totonu ia te outou. Ai se tasi ua le ia te ia le Agaga o Keriso, e le fai lea mona.

Galuega, 13:52.

A ua tutumu le au soo i le olioli ma le Agaga Paia.

Galuega, 4:31.

Ua mavae atu la latou tatalo, ona luluina lea o le mea ua faapotopoto ai i latou; ua tutumu foi i latou uma i le Agaga Paia, ma ua tautala atu'i le afioga a le Atua ma le faamalosi.

Salamo, 34:18.

Ua latalata mai Ieova i e ua loto momomo; ua ia faaola foi i e ua loto nutimomoia.

Isaia, 66:2.

Na faia ia mea uma e o'u lima; sa i ai lava ia mea uma, ua fetalai mai ai Ieova; a o lenei le tagata ou te vaai i ai, o le ua faamaulalo ma le loto tiga, o le ua gatete foi i la'u upu.

Faaaliga, 21:4.

E sôloiesea foi e le Atua loimata uma i o latou mata; e leai foi se toe oti, po o se faanoanoa, po o se aue, e leai foi se toe puapuaga; auā ua mavae atu mea muamua.

Salamo, 37:3.

Ia e faatuatua ia Ieova, ma e faia amio lelei; ia e nofo i le nuu, ma tausisi i le faamaoni.

I. Peteru, 4:12, 13.

Le au pele e, aua tou te ofo i le tofotofoga pei o le afi, ua oo ia te outou e fai ma tofotofoga ia te outou, peiseai o se mea fou ua oo ia te outou; a e faapei ona tofusia o outou faatasi i tiga o Keriso, ia outou olioli ai, ina ia fiafia outou ma le olioli tele pe a faaalia mai lona mamalu.

Mataio, 28:20.

... faauta foi, ou te ia te outou i aso uma lava, e oo lava i le gataaga o le lalolagi. Amene.

Eperu, 2:18.

Auā na tigaina o ia ina o tofotofoina, o le mea lea ua mafai ai o ia ona fesoasoani i e ua tofotofoina.

Roma, 16:20.

E le pine foi ona solia o Satani i lalo o outou vae e le Atua e ona le manuia. Ia ia te outou le alofa tunoa o lo tatou Alii o Iesu Keriso. Amene.

Salamo, 34:19.

E tele lava mea leaga e oo i le ua amiontonu; a e laveaiina o ia e Ieova ai ia mea uma.

Isaia, 43:2, 3.

A ē sopoia atu le vai, ou te ia te oe; a ē sopoia atu vaitafe, e le lofia ai oe; a ē savali i totonu o le afi, e

le mu ai oe; e le susunuina foi oe i le mumū o le afi. Auā o a'u o Ieova lou Atua, o le Paia o Isaraelu, lou Faaola

Roma, 8:28.

Ua tatou iloa foi e galulue faatasi mea uma e lelei ai latou e ua alofa atu i le Atua, o e ua valaauina i lona finagalo.

I. Korinito, 10:13.

Ua le maua outou e se tofotofoga e ese i lo tagata; a ua faamaoni le Atua, o le na te le tuuina atu outou i le tofotofoga e sili i se mea ua outou lavatia, a e sauni foi faatasi ma le tofotofoga se mea e sao ai, ina ia outou lavā oono.

Faaaliga, 3:5.

O lē manumalo, e faaofuina o ia i ofu sisina; ou te le sōloiesea foi lona igoa i le tusi o le ola, a e ou te ta'u atu lona igoa i luma o lo'u Tamā, ma luma o ana agelu.

Faaaliga, 3:12.

O lē manumalo, ou te faia lea ma pou tu i le malumalu o lo'u Atua, e le toe ulufafo lava ia, ou te tusi foi i ai le suafa o lo'u Atua, ma le igoa o le aai a lo'u Atua, o Ierusalem fou lea e alu ifo nai le lagi mai lo'u Atua, atoa foi ma lo'u igoa fou.

Faaaliga, 3:21.

O lē manumalo ou te avatua ia

te ia ma te nonofo faatasi ma a'u i lo'u nofoālīi, e pei o a'u foi ona ou manumalo, ua ma nonofo foi faatasi ma lo'u Tamā i lona nofoālīi.

Faaaliga, 21:7

O lē manumalo e maua e ia mea uma, e fai foi a'u mona Atua, e fai foi o ia mo'u atalii.

Faaaliga, 2:7.

O le ua i ai taliga, ina faalogo mai ia o ia i le mea ua fetalai mai ai le Agaga i ekalesia, O lē manumalo, ou te avatua ia te ia e 'ai i le laau o le ola o i totonu o le parataiso o le Atua.

46 Fetalaiga A Le Atua Ia I Tatou E Uiga I Le Tatalaina O Faaipoipoga

I Korinito, 7:10, 11.

Ou te fai atu foi i e ua fai avā
ma nofotane, e le o a'u, a o le Alii,
Aua le te'a ese le avā i lana tane,
afai foi e te'a, ia nofo fua pea ia,
pe toe lelei ma lana tane; aua foi le
molia e le tane lana avā.

Luka, 16:18.

O sē faatea i lana avā, a e fai
avā i se tasi, o le mulilua lea; o sē
fai avā i le ua faateaina e lana
tane, o le mulilua foi lea.

Roma, 7:2, 3.

Auā o le fafine nofo tane, ua
noanoa ia e le tulafono i lana tane

a o ola o ia; a e afai ua oti le tane,
ona talaina lea o ia ai le tulafono i le tane. O lenei foi, afai e
nofo tane o ia i se tasi, a o ola lana
tane, e ta'ua ia o le mulilua; peitai
ane, afai ua oti lana tane, ona tuu-
saunoa lea o ia i le tulafono; i le, a
nofo o ia i se tasi tane e le mulilua
ai o ia.

Mataio, 5:32.

A ou te fai atu a'u ia te outou, ai
se faatea lana avā, a e lei mulilua
ia, ua ia faamulilua ia te ia; ai se
fai mana avā le ua faateaina, ua
mulilua foi o ia.

Ioane, 14:3.

Afai foi ou te alu ma sauni se mea e nonofo ai outou, ou te toe sau, ou te talia foi outou ia faatasi ma a'u; ina ia i ai outou i le mea ou te i ai a'u.

Faaaliga, 3:11.

Faauta, ou te vave alu atu; ia e taofi mau i le mea ua ia te oe, ne'i avea e se tasi lou pale.

Mareko, 8:38.

Auā ai sē mā ia te au, ma a'u upu i lenei tupulaga mulilulua ma le agasala, e mā foi le Atalii o le tagata ia te ia, pe a sau o ia faatasi ma ana agelu paia i le mamalu o lona Tamā.

Mataio, 24:30.

Ona iloa ai lea i le lagi o le faailoga o le Atalii o le tagata; ona taufaitagitu'i ai lea o itu aiga uma o le lalolagi; latou te iloa atu foi le Atalii o le tagata ua sau i ao o le lagi ma le mana ma le mamalu tele.

Iakopo, 5:8.

Ia onosai foi outou, ia faatumauina o outou loto, auā ua latalata le afio mai o le Alii.

Mataio, 24:27

Auā e pei ona emo mai o le uila i sasae, ma malamalama atu i sisifo; e faapea foi ona sau o le Atalii o le tagata.

I. Ioane, 3:2.

Le au pele e, o le fanau i tatou a le Atua i nei ona po, a e lei faaalia mai nei le uiga o i tatou a amuli; a ua tatou iloa, pe a faaali mai o ia, ona foliga ai lea o i tatou ia te ia, auā tatou te iloa tino ai lava o ia.

Faaaliga, 16:15.

(Faauta, ou te alu atu pei o se gaoi; amuia lē mataala, ma tausi i ona ofu, ina ne'i savali o ia e lē lavalavā, ne'i latou iloa atu foi lona mā.)

Luka, 12:40.

O lenei, ia outou nofo sauni; auā o le itu aso tou te le manatunatu ai, e sau ai le Atalii o le tagata.

Galuega, 1:11.

Ua la fai mai, O outou tagata Kalilaia e, se a le mea tou te tutū ai, ma vaavaai i le lagi? O Iesu lena, ua aveina ae nai ia te outou i le lagi, e faapea ona toe afio mai o ia, pei o lona afio atu i le lagi na outou vaavaai i ai.

Mataio, 16:27.

Auā e sau le Atalii o le tagata faatasi ma ana agelu i le mamalu o lona Tamā; ona tauia lea e ia e taitasi e tusa ma lana galuega.

Luka, 21:27.

Ona iloa atu ai lea e i latou o le Atalii o le tagata e sau i le ao, ma le mana ma le mamalu tele.

Afioga A Le Atua

O Tusi Paia uma lava e mai le Agaga o le Atua ia, e aoga foi ia e a'oa'o ai, e aoai ai, e faatonu ai, e faapoto ai foi i le amiontu.

—II. Timoteo, 3:16.

Auā e le o le loto o tagata na tuu mai ai le valoaga anamua, a o tagata paia o le Atua na talatalaina mai ina ua osofia mai e le Agaga Paia. —II. Peteru, 1:21.

Auā o loo ola le afioga a le Atua, o loo matuā galue foi, o loo sili foi lona maai i pelu uma e faatau maai itu, o loo vaevae foi e oo lava i le vavaeeseina o le loto ma le agaga, o gaugātino foi ma aano o ivi, o loo faamasino

foi i manatu ma filifiliga o le loto.

—Eperi, 4:12.

E mavae atu lava la lagi atoa ma le lalolagi; peitai o a'u upu, e le mavae atu lava ia.

—Luka, 21:33.

Ieova e, ua mausali lau afioga i le lagi e faavavau lava.... O lau afioga o le sulu lea i o'u vae, ma le malamalamā i lo'u ala.

—Salamo, 119:89, 105.

Ona tali atu ai lea o Iesu, ua faapea atu ia te i latou, Ua outou sese lava, ina ua outou le iloa le upu o Tusi, ma le mana o le Atua.

—Mataio, 22:29.

Published in numerous languages by World Missionary Press, Inc.,
as God supplies funds in answer to prayer. **For questions or more
information by country, visit: www.wmp-contacts.org**



World Missionary Press
PO Box 120
New Paris, IN 46553-0120 USA
www.wmpress.org

8-24

Read booklets online or by App
www.wmp-readonline.org

154 Samoan HFA